



**ATASSUT**

**UPA 2016/114**

**Steen Lyngø**

**15.04.2016**

**Uunga siunnersuut: Ilinniagaqarnersiutit pillugit Inatsisartut inatsisaata**

**allangortinneqarneranik Inatsisartut inatsisaat nr. xx af xx xx 2016-imeersoq**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersui- soq)

Pingaarteqarpoq inuusuttortavut ilinniagaqarnissaat. Taamatullu pingaartigaaq, ilinniartut ilinniarnerteq naammassiaartassagaat.

Inatsisinik allanguiniarnermi siunertarineqarpoq, inuusuttut ilinniakkaminnik naammassiaartarnissaat, tamannalu ukioqalernissaq aaliangersimasoq tikitsinnagu pisarnissaa siunertaallunittaaq.

Siunnersuummi inuusuttut 26-nik aammalu 28-inik ukioqalersimanitinnatik ilinniakkaminnik naammassinnittut ilinniarnermi aningaasanik taarsigassarsisimasut, utertitsinissaminnut taperneqarsinnaasut.

Inuusuttut ukiut taaneqartut ataallugit atukkanik utertitsinissaminnut atatillugu atukkamit 100 % tikillugit taperneqarsinnaanerata aqutissiuunniarneqarpoq.

Siunnersuut pineqartoq misissoraanni apeqqutit arlallit qaffakaalersarput. Apeqqutit isummerfigineqartariaqartut siunnersuutip akuerinnginnerani: tassalu

Assigiimmik ilinniarsimasut marluusut akornanni sorleq inuiaqatigiinnut naleqarnerusutut taallugu nalilersortalissavarput imal. nalilersorsinnaavarput?

Nunatsinni ilinniartitaanikkut ima piisaartigaagut, allaat nalilersorsinnaallugu inuusuttoq 26-inik imal. 28-inik ukioqalertsinnani ilinniarnermi naammassisoq inuiaqatigiinnut naleqarnerusoq?

Inatsimmik allanguutissatut siunnersuutip siunertaa tunngaviatigut isumaqataaffignarpoq, tassani anguniarneqarmat ilinniagaqartut ilinniarnerep piffissaritaata iluani naammassisarnissaat.

Taamaattorli Atassut-mi isumaqarpugut, ilinniagaqartut akornanni kikkut nunatsinnut iluaqutaanerusutut imaluunniit naleqarnerusutut nalilersussallugit akissaqanngitsugut.

Siullertut nassuerutigisariaqarparput nunatsinni ilinniarsimassutsikkut sutigut tamatigut amigaateqaratta. Taamaammallu kikkut tamarmik ilinniargaqarnissaat pisariaqartikkatsiguk.

Aappaattut naatsorsuutigineqartariaqarpoq, inuusuttut inersimasullu - siunnersuummi ilinniakkamik naammassinissamut killissarititat qaangerlugit ukioqalersimallutik naammassisussat - ilinniarnerminni, inuusuttuaqqanut atuarfimmit naammasserlaanut sanilliullugit ulluinnarni aningaarsartuutaat qaffasinnerusarmata. Taakkumi pineqartut immaqalaqutaqalereerlutik ilinniarlersimasuusarput imaluunniit ilinniarnerminni ilaqaqalersimasuusarlutik. Taamaammat ilinniartut ilaqaqartut tapersersornissaat aammalu kaammattornissaat annertunerulluni.

Atassut isumaqartuarpoq kaammattuinnikkut inuiaqatigiit akisussaaffinnik tigusinassaat sutigut tamatigut aqqutissiuunneqartariaqartoq. Kaammattuinnermi aqqutit assigiinngitsut atorneqarsinnaapput. Taamaattorli erseqqissaatigissavarput, Atassut-mut pingaarluinnarmat innuttaasut assigiimmik pisinnaatitaaffeqarlutillu akisussaaffeqartinnissaat.

Innuttaasoq kinaanera, suaassusaa, ukiui imaluunniit isummersortaasia aallaaviginagu assigiimmik pineqartuarnissaat pingaaruteqarpoq.

Taamatut oqaaseqarluta Atassut-mit siunnersuutigissavarput - ilinniagaqartut ilinniarnep piffissakkut killigititaasa iluanni naammassisut ukiui apeqqutaatinnagit ilinniarnerminni taarsigassarsiaannik utertitsisoqartillugu 100 %-imik taperneqartarnissaat uani inatsisimi ilanngunneqassasoq.

Taamatut siunnersuuteqarluta siunnersuut pineqartoq ataatsimiitsitaliamut ingerlaqqinnissaa Atassut-mit taaseqataaffigissavarput.